

國朝詩人徵略

國朝詩人徵略卷三十四

番禺張維屏子樹輯

翁方綱

字正三號覃谿順天大興人乾隆十七年進士官
內閣學士左遷鴻臚寺卿有復初齋集

覃谿年甫及冠已入詞垣而精心績學宏覽多聞
所著兩漢金石記剖析毫芒參以說文正義幾欲
駕洪文惠而上之近年研精經術嘉慶己未予入
京師見其方攷禹貢顧命兩篇諸儒同異相與辨
難斷斷竟日詩宗江西派出入山谷誠齋間雖嘗

仿趙秋谷聲調譜取唐宋大家古詩審其音節刊
示學者然自作亦不能盡合也書法初學顏平原
繼學歐陽率更隸法史晨韓勅諸碑生平雙鉤摹
勒舊帖數十本北方求書碑版者畢歸之

湖海詩傳

自漁洋先生取嚴滄浪以禪喻詩謂詩有別才非
關學也於是格調流於空疎神韻淪於寥闕矣吾
友覃溪蓋純乎以學爲詩者歟自諸經傳疏以及
史傳之攷訂金石文字之爬梳皆貫徹洋溢於其
詩雖所服膺在少陵瓣香在東坡而初不以一家

執也

陸廷樞撰復初齋詩集序

覃谿先生精心汲古宏覽多聞於金石譜錄書畫
碑版之學尤能剖析毫芒如肉貫弗生平論詩謂
漁洋拈神韻二字固爲超妙但其弊恐流爲空調
故特拈肌理二字蓋欲以實救虛也復初齋集中
詩幾於言言徵實使閱者如入寶山心搖目眩蓋
必有先生之學然後有先生之詩世有空疎白腹
之人於先生之學會未窺及涯涘而輕詆先生之
詩是則妄矣

聽松廬
文鈔

雍正十一年癸丑八月十六日先生生 乾隆九
年甲子先生年十二是年六月補順天府學生錄

花日大雨家無雨衣以油紙覆衫上 十二年丁

卯先生年十五是年鄉試中式舉人 十七年壬

申先生年二十是年會試中式進士會榜在九月

殿試改庶吉士先生自編復初齋詩集於是年始

十九年甲戌先生年二十二是年散館授編修

二十四年己卯先生年二十七是年秋奉

命典試江西 二十七年壬午先生年三十是年奉

命典試湖北 二十九年甲申先生年三十二是年秋奉

命視學粵東 三十六年辛卯先生年三十九自甲申秋

至辛卯秋視學役竣凡三任八年 三十七年壬

辰先生年四十是年春二月還都 三十八年癸巳先生年四十一是年冬得宋槧蘇詩施顧注本因以寶蘇名室 四十一年丙申先生年四十四是年冬奉

命充文淵閣校理官 四十二年丁酉先生年四十五是年除夕前一日

賜柑橘橙有恭紀詩 四十三年戊戌先生年四十六是年七月十八日

賜荔支有恭紀詩 四十四年己亥先生年四十七是年秋奉

命典試江南 四十五年庚子先生年四十八是年秋扈
蹕灤陽 四十六年辛丑先生年四十九是年擢國子監
司業閏五月擢司經局洗馬 四十七年壬寅先
生年五十是年馳贈曾祖父母行焚黃禮敬述有
詩自註云四品以下向無馳贈曾祖之例茲出
特旨蓋異數也 四十八年癸卯先生年五十一是年正
月蘇詩補注刻成八月奉

命充順天鄉試副考官 四十九年甲辰先生年五十二
是年春閏三月遷少詹事秋扈

蹕灤陽 五十一年丙午先生年五十四是年秋奉

命視學江西 五十二年丁未先生年五十五是年嗣君

宜泉太史

樹培

中式進士選庶吉士 五十四年

己酉先生年五十七是年冬視江西學役竣還都
五十五年庚戌先生年五十八是年春扈

蹕山東奉

勅充曲阜釋奠分獻官冬十月

上御乾清門先生以學士承

旨嗣君宜泉太史以檢討侍班有敬述詩 五十六年辛

亥先生年五十九是年春隨

駕往盤山冬奉

命視學山東 五十八年癸丑先生年六十一是年五月
登泰山有登岱詩 五十九年甲寅先生年六十
二是年春扈從天津先生藏書三萬卷是冬有自
題三萬卷齋詩 嘉慶元年丙辰先生年六十
是年春正月四日

賜千叟宴先生有恭依

御製詩韻詩二首自註云筵上蒙

賜

御製詩一卷錦綺十卷綵箋二卷玉嵌如意一柄紅琥
朝珠一串湖筆五硃墨二周提梁白硯一金合一

齋戒牌一荷包二對杭緯二匣金字壽杖一
年己未先生年六十七是年春授鴻臚寺卿
年辛酉先生年六十九是年寓馬蘭峪溫輝三傳
三禮久不作詩冬爲季子樹崐締婚李氏九年
甲子先生年七十二是年畱題馬蘭峪寓齋詩有
三戴枝棲荷

主恩暮春悵別緒誰論之句又有蒙

恩家居以退圃自名其齋詩夏重赴泮林宜泉太史隨侍
有敬拜宮牆詩 十二年丁卯先生年七十五是
年秋奉

旨賜三品銜重預鹿鳴宴有紀

恩述懷詩

十五年庚午先生年七十八是年宜泉太史

下世先生有哭培兒詩

十九年甲戌先生年八

十二是年四月

賜加二品銜重預

恩榮筵宴有恭紀詩

二十三年戊寅先生年八十六是

年 月

日先生卒

屏欲撰先生年譜而未

得其詳先生既歸道山兄家傳墓誌屏未獲見茲

就詩集中舉其大略而詩集僅刻至第六十六卷

亦闕而未全俟他時訪得其詳擬補成之

同上

嘉慶丁卯四月屏入都時覃谿先生罷官家居海
內騷壇歸然魯靈光也顧朋輩中每言先生持論
太嚴門牆太峻是以屏於先生門下雖有淵源未
往請見九月一日先生嗣君宜泉太史忽見訪言
家君知子來已數月曷爲不往相見今日特命僕
來奉約明晨便往勿遲也屏諾之翼日往見先生
顏色甚歡謂屏曰前年伊墨卿攜子詩一冊示余
余意中早有一張南山乃今始得握手於蘇齋耶
於是共几對談辱承獎藉並追話魚山葯房在都
時事又詳詢二樵生平而於魚山之歿則尤嗟悼

不已越日屏賦詩呈先生是以有獎許鯁生詩仿

佛馮子筆爨桐賞音慙墓草餘涕澀之句而先生

亦賦五律三章見贈詩云南山舊墨緣韶石響鳴

絃鳴絃峯英德南山也江碧深畱鏡榕陰記泊船詩盟圓似

夢易說了非禪石汝彌興坡公談易在英德南山紹聖前題字重

拈四十年山志陶貞白松濤李少溫鶴銘笙簫共

慧麓篆煙痕淪乳來參味青蒼許對論多生耳根

業訊爾妙之門爲南山臨陽冰聽松篆風抗南園後魚山又

葯房何區五家派莫誤二樵狂酣放精微處崇梁

乘尺量於蘇窺杜法詩境乃升堂又爲屏題聽

廬畫卷云松石本無意苔岑成夙期
竟憑真氣合不恨淡交遲
萬谷笙鐘起千峰雨雪時
琅然鸞鶴語卷外許誰知
以爾松廬境參予石畫軒
研屏相澹對濤籟卽清言
雪乳香浮瓊菖蒲綠結盆
琅玕芝草長息息見深根
屏南旋後先生數郵書垂問
又見寄詩云千里金_山呼張_南叩筏津
一源蘇杜孰推論杜惟質
厚原無詆蘇取雄奇恐未真
故紙何關拈笑處焚香要共
會心人樂_蓮吳_蘭雪隔巷精微
訊但卓錫來未是貧末句望
屏北上勲拳之意溢於楮墨
今先生詩翰手蹟皆藏篋中
每一展覽如

親杖屨愴懷知己追溯典型不禁泣然隕西州之

涕也

聽松嵐詩話

由羅入浮有嶺甚峻余名之曰分霞嶺先生寄題
分霞嶺詩云羅浮二山界舊名佛子凹蓬萊之左
股鵬羽掣六鼈到此蒼翠間風雨氣乃交分霞名
初勒五色鳥所巢遠寄五字題墨湧千峰高竊

張子意補昔伊守勞

昔伊墨卿守惠州有書云羅浮山中未有覃溪詩

補之琅然少霞銘聲接大海潮又有寄題雲泉山

詩今勒山館壁又聞屏遊羅浮見寄詩有南山社

伴入羅浮袖有松濤萬壑秋之句同上

標題

紀連州山水六百四十字

古五

拱北

漏歌

古七

九曜石歌

古七

書萬季野明史

列傳手彙殘本後

古七

永樂大典餘紙歌

古七

閔正齋奉饌圖

古五

登攝山最高峰

頂作歌

古七

文信國琴歌

古七

古刺水歌

古七

六君子圖歌

古七

石鼓歌

古七

趙子

固落水蘭亭卷

古七

小滄浪月夜作

古七

摘句

杜詩於楚終蘇詩於楚始

瀑布三十丈分瀉八九灣灣復以湖名寺

乃開中間

一夕枕簟涼海氣颯而入四窗如浮動萬
壑乃呼吸

百里積雪光晶晶浮遠天宿麥萬頃綠
破瓊瑤田

風涼遠岬笛月上昏林磬此時波不興下
上一綠淨

北方三月雨其價無與酬點滴土生香何
減珠玉投所以雨曰膏自彼雲之油

三折五折水樵人野人屋路古氣澹泊時
遇杉與竹

闌干十二曲海綠搖一片
流水答松風空山響碁子
碧瀾寸寸色澹與空光會
閱世三十年方知學爲福
下上歐韓柳周流蜀楚淮
好山如善抱老柳不知寒
小紅深淺蕾新綠短長條
露翻垂葉響水與立苗齊
草痕纔過雨松頂有畱雲
神來非假力意到不容刪

海山正青海水黑水閒十丈水花白千頃

萬頃爛茫茫中見扶桑一痕碧

渡海中流作

烟雲籀篆文字禪竹樹燈光風露氣

奔流萬里河之曲上下千年漢以來

贈錢捧石

春社雞豚桑葉雨晚陽籬柵菜花風

沙村綠出潮痕外野水青迴蜃氣中

冉冉晚雲昏似墨濛濛春雨綠如烟

三千里外挑燈話四十年前聽雨心

寄內

今我來思還視昔樹猶如此況於人

寒柳

錢載

字坤一號蘅石浙江秀水人乾隆十七年進士官
禮部侍郎有蘅石齋詩集

蘅石襟情蕭曠真率自如性豪飲常偕朱竹君學
士金輔之殿撰陳伯恭王念孫兩編修過余冬夜
消寒卷波浮白必至街鼓三四下時竹君推戴東
原經術而蘅石獨有違言論至學問可否得失處
蘅石輒發赤聚訟紛拏及罷酒出門斷斷不已上
車復下者數四月苦霜濃風沙蓬勃餘客佇立以
俟無不掩口而笑者善鑒別書畫尤工繪事晚年

致仕歸藉以給朝夕乾隆庚戌年八十三猶爲子

做黃鶴山樵長林修竹極雨葉風枝之妙

湖海詩傳

蔣石侍郎雍正壬子副榜乾隆丙辰舉鴻博報罷至壬申成進士年四十五矣是年會試在八月香

樹先生賀詩云刻成楮葉廿年遲著論韓公伸紙

時朵殿爭看和氏璧瓊筵笑插菊花枝注云今年

會試題卽廿年前中副榜題也與退之不貳過論

題事相類

梧門詩話

蔣石詩以博大爲宗神景開闢不愧鉅手

南野堂筆記

錢蔣石云三百篇都是疊此語可參

香石詩話

稗石先生詩不名一家大要以清真鏗刻爲主有時或入於澀滯而必切事以抒辭有時或出以纖新而必切景以造句凡詩中空架子假門面之語皆埽而空之故集中時有獨到處而述巷司寇乃謂其詩率然而作蓋未細觀其全集也

聽松廬詩話

稗石七律偶舉其一如到家作第二首云久失東牆綠萼梅西牆雙桂一風摧兒時我母教兒地母若知兒望母來三十四年何限罪百千萬念不如灰曝檐破襖猶藏篋明日焚黃祇益哀字字沉實字字動盪其佳處未嘗不從古人來却能于古人

之外自成面目

同上

又如宜亭新柳第四首云寶花倉口起東風雞鳴
星懸賦惱公笛裏關山今是淚梢頭明月本來空
一聲玉折涼州怨萬里雲陰杜宇紅歸去傷心原
有路依然水驛綠烟中句句賦物却句句是悼人
性情風調一氣鎔成尤須看其真氣貫注同上

標題

上巳登平山堂

古

滄浪亭

古

插秧

板晉

古

馬文毅公彙草辨疑歌

古

宿雄縣倣孟貞曜體

古

僮歸

五古

第五

首

興隆店

古

寄善元樽于南窪

五

古

天佑助威大將軍歌

七古

天聰五

始

二硯歌

七古

黃文節公小像

七古

樂草堂海棠花歌

七古

摘句

山川愛玉璞草木驚春雷元氣有必洩豈

得長胚胎

天行四時德要使生物康生生伏物害遂

乃殺以霜冰雪除衆毒泰然復春陽

出土青見根千尋削巨凸或皆側疊成石

與石相切

豈無一刻心豈無一事知迂疎偃仰謝薄

卷三
弱蹉跎隨古賢傷不遇遇矣今何辭

露氣溼松竹無風滴如雨

路隨崖數盤人與地俱瘦

天影淺深水鴈聲前後山

人氣得涼定市聲隨笑來

楊柳影邊水鷺鷥飛處風

尚有平生意今成未盡言

清氣天臨地遠情江送山

聖自先尼父風還踵伯夷

柳下惠墓

天皇大帝居高理太皞勾芒報政成

浮生那必關天地轉瞬眞憐卽古今

老嫗古祠盃琰火羣兒高阜紙鳶風

殘山剩水春三閣燕子桃花酒一杯何限

斜陽人詩句笑君猶爲昔人哀

早禾渴雨雨而雨修樹藏山山復山

出城樓閣連山起對岼人家兩郡開

武昌

三揖三終三讓禮杖鄉杖國杖朝人

摯虞禮自心喪議宋玉魂終像設招

扇影衫痕秋水上桺絲荷蓋夜燈前

掌謀蓮幕書生力拜慶萱堂孝子身

送王述菴

寧申岐薛亭臺里車馬衣裳士女風

樂遊原

先生論詩喜講句法句法中喜講疊法如此聯一字一頓竟可謂之七疊矣

蠟屐唾壺紛士女投鞭麾扇此江山

秣陵

春物儘隨新歲見舊情安得故人言

困學前惟王伯厚日知近有顧亭林

插架圖書鄴侯軸滿庭風露趙昌花

香踰佛土優曇烈晚壓閨人末麗寒

吐必落索

此卽晚香玉也粵人呼爲玉簪其實玉簪另是一花

惆悵城西南路動百年中又一回來

假使桃花也蘇姓屬他小小屬髯公

梁同書

字元穎號山舟浙江錢塘人乾隆十七年進士官
侍講

文莊生二子長卽公文莊未達時家故貧居鳳皇
山麓包夫人夜織公兄弟方幼戲于旁虎突入戶
夫人驚絕旣蘇視兩兒戲如故問之曰有大獸來
四顧而去亦不知爲虎也

鑑止水齋集

嘉慶十二年丁卯公重宴鹿鳴加翰林院侍講學
士銜時海內重與宴者皆止加虛銜惟公獨具官
名蓋公耆德清望聞於

天聽久矣公治生頗纖悉人有緩急拯濟無所吝杭俗好
華靡喪車必以影神樓前導惟公家一依禮制儀
從外無浮飾二氏之徒不入門十六年公患腦疽
危篤兄有人持楹帖入其句曰萬里煙雲開嶂戶
一天風雨護神鱣病遂愈逾四年至二十年卒年
九十三卒前數日自書訃筆法蒼勁如平時公書
法顏柳中年用米法七十後愈臻變化純任自然
日本國有王子好書以其書介舶商求公評定琉
球生自太學歸國踵公門乞一見公以無相見儀
却之其人太息曰來時國王命必一見公而歸今

不可見奈何因丐公書一紙曰持是以復國王耳

公論學書大旨具於與孔谷園及張芑堂兩書上

同

山舟性不近婦人不宴客亦不赴人之宴故余寄

詩云一飯矜嚴常選客半生孤冷不宜花

隨園詩話

摘句茅堂開三間以書作襟背左旋而右拙上

睽或旁睇

北人麥爲飯炎毒苦難戢生豚勝梨頭涼

冷沁肺葉

蘿菔

登仙直是尋常事雞犬由來亦上天

反遊仙

上界不聞阿堵貴道人偏要鍊黃金

畢竟人間勝天上不然劉阮不歸來

盧文韶

字紹弓號磯漁浙江仁和人乾隆十七年

賜進士第三人官侍讀學士有磯漁詩橐抱經堂文集

官中書十年讀經史皆徧以朱筆點定訛字提督
湖南學政以條奏學政事宜降調告養歸歷主鍾
山崇文龍城諸書院講席取舊時校正各書擇尤
要者如經典釋文孟子音義逸周書白虎通等書
次等授梓著述已刻者儀禮注疏詳校鍾山札記

龍城札記未刻者廣雅注釋

兩浙輟軒錄

紹弓官京師與東原交善始潛心漢學取易禮注
疏呂氏讀詩記魏書宋史金史新唐書諸本脫漏

者薈萃一書名曰羣書拾補

國朝漢
學師承記

紹弓爲敬甫先生之子馮山公之外孫桑叟甫之

壻故其學有本原

松軒
隨筆

摘句

交憐同臭味貧有好容顏

湯盤禹鼎古有器今其在者祇文字世間

何物最堅牢金石猶然遭失墜固知古人

絕愛名亦望後人能好事

讀金
石錄

入座山光全勝畫隔簾人影總疑花

周大樞

字元木一字元牧浙江山陰人乾隆十七年舉人
官敎諭有居俟堂集

詩文高勁秀出力追古則

廷試日瘡疾未愈書多所遺落不得入等

詞科掌錄

果毅公延爲上客每公餘命講通鑑數則

隨園詩話

標題 隆福寺觀市一百韻

此贈子才

摘句 夕陽明晚稻秋水倒疎花

成佛未甘居謝後論文那得在盧前

浪說儒門羞五尺只今江左幾夷吾

管仲墓

陸 燿

字朗夫號青來江南吳江人乾隆十七年舉人官
湖南巡撫有切問齋集

公舉京兆補中書人軍機房公在樞垣倬直至日
晡猶不退有急務立辦以故大學士傅文忠公屢
薦公以戶部郎中補登州府知府其守濟南也上
書請截畱南糧爲積貯計任河道時上書請疏泉
源增修月河爲臬使時以徒犯罪輕請免解司以
省苦累甲午壽張縣王倫作亂距運河甚近有欲
閉城者公不可曰寇未至先閉城門是示之怯也

且鄉民爭入城何忍棄之乃募鄉兵拒守而身自坐城闔彈壓稽察賊知有備不敢南向撫楚時奏官員凡親年七十雖有次丁俱許終養一時中外官歸養者千餘人

小倉山房文集

朗夫爲湖南巡撫時總督以閱兵抵長沙朗夫迎謁畢還署總督鈕祜祿君特昇額來候直入解中方午食見所食皆菽乳菜蔬訝之曰天不雨地方官戒殺清齋故所食如此總督素豪侈聞語瞿然詈其奴曰吾此來傳舍酒肉如山何不以祈雨告耶歸寓悉撤其豐腆人羨總督之知過而益歎君

之清德感于人者速也

湖海詩傳

朗夫先生所輯切問齋文鈔嘉惠後學不淺其自序有云道備於經既有漢之箋故唐之義疏宋之章句微言大義已可無憾而復尋摭細瑣抉剔幽隱紛如聚訟無益毫毛此何爲者也道猶路也路有實徑適越者必南轅之燕者必北轍今舍而不由閉戶而談天道高座而說明心學案語錄之書日出而不窮異同宗旨之辨相攻而不已高明者墮入禪宗篤實者窘於應務此又何爲者也云云余深有契乎其言蓋講攷据而入於瑣碎談心性

而墮於虛無皆無裨於實用也知此則知切問齋

文鈔一書亦期於有用而已

聽松廬
文鈔

摘句 酒闌辭歲後人靜獨吟時

除夕

苛節刪於相熟後淡懷長似訂交初

阮葵生

字寶誠號吾山江南山陽人乾隆十七年舉人官

刑部侍郎有七錄齋集

辛巳會試取中正榜授內閣中書軍機司員處行走補刑部主事諸城劉文正公告同列曰阮某選西曹總識事有人矣明年總辦秋審有兄被殺而

父受賂私和弟首其事證父以賄擬徒公判曰爲
兄洩憤手足之誼雖全陷父充徒恩義所傷實重
使依前擬不特父不能無憾於子子亦何能一息
自安應改子首如父自首例令其弟代父充徒則
無媿兄弟之義亦不賊父子之恩矣

厚經
室集

吾山司寇撰茶餘客話三十卷戴蕨塘爲選十二
卷仿畢昇活字板印行蕨塘謂其記前型搜逸事
攷證典物多有未經人道者余謂卽擬諸漁洋池
北偶談數種亦正不多讓也

松軒
隨筆

摘句 眞成湖上烟波客苦戀江南橘柚天

國朝詩人徵略卷三十五

番禺張維屏子樹輯

紀昀

字曉嵐一字春帆號石雲直隸獻縣人乾隆十九年進士官至協辦大學士諡文達有紀文達公集公貫徹儒籍旁通百家

高宗純皇帝命輯四庫全書公總其成凡六經傳注之得失諸史記載之異同子集之支分派別罔不抉奧提綱溯源徹委所撰定總目提要多至萬餘種攷

古必衷諸是持論務得其平

學經室集

世爲河間著姓祖天申有善行父容舒官姚安太守河間爲九河故道天雨則窪中汪成旦浸夜有火光天申夜夢火光入樓中而公生火光遂隱人以爲公乃靈物托生也少而奇穎讀書過目不忘夜坐暗室二目如電光不燭而能見物比知識漸開光卽斂矣年二十四乾隆丁卯科解元甲戌成進士授庶吉士散館授編修己卯充山西鄉試正考官壬午提督福建學政戊子授貴州都勻知府晉侍讀學士緣事累謫發烏魯木齊効力辛卯

召還授編修三十八年擢侍讀

命爲四庫全書館總纂官丙申授侍讀學士充

文淵閣直閣事日講起居注官己亥擢詹事旋晉內閣學士壬寅授兵部右侍郎仍兼直閣事改任不開缺乃異數也甲辰充會試副考官壬子畿輔水災奏請截畱南漕萬石設十廠賑饑全活無算嘉慶元年丙辰充會試正考官轉兵部尚書癸亥六月以八旬開秩

上遣官賻

上方珍玩賜之是年奏婦女猝遭強暴捆縛受污不屈見戕者例無旌表臣謂捍刃捐生其志與抗節被殺

者無異如忠臣烈士誓不從賊而紫縛把持雖使
跪拜可謂之屈膝賊廷哉請

敕交大學士九卿科道公議與未被汚者略示區別量子
旌表大學士等議奏如兇手在兩人以上顯係孱
弱難支與強姦被殺者一體予旌飭交各督撫勘
明情形請

旨定奪

報可乙丑正月奉

旨調禮部尚書協辦大學士加太子少保管國子監事十
五日卒於位年八十有二

賜祭葬

子諡文達公於書無所不通尤深漢易力闢圖書之謬

四庫全書提要簡明目錄皆出公手大而經史子集
以及醫卜詞曲之類其評論抉奧闡幽詞明理正
識力在王仲寶阮孝緒之上可謂通儒矣胸懷坦
率性好滑稽有陳亞之稱然驟聞其語近於詼諧
過而思之乃名言也

國朝漢
學師承記

或言紀文達公博覽淹貫何以不著書余曰文達
一生精力具見於

四庫全書提要又何必更著書今人目中所見書不

多故偶有一知半解便自矜爲創獲不知其說或爲古人所已言或爲昔人所已駁其不爲牀上之牀屋下之屋者蓋亦鮮矣文達之不輕著書正以目逾萬卷胸有千秋故也或又言文達不著書何以喜撰小說余曰此文達之深心也蓋考據辨論諸書至於今已大備且其書非畱心學問者多不寓目而稗官小說搜神誌怪談狐說鬼之書則無人不樂觀之故文達卽於此寓勸戒之方含箴規之意託之於小說而其書易行出之以諧談而其言易入然則閱微草堂筆記數種其覺夢之清鐘

迷津之寶筏乎觀者慎無以小說忽之

聽松廬文鈔

姜西溟不食豕紀曉嵐不食鴨自言雖良庖爲之亦覺腥穢不下咽且賦詩云靈均滋芳草乃不及梅樹海棠傾國姿杜陵不一賦以梅花海棠爲比鴨又何其幸也嗟乎嗜好愛憎之間有難強者豈惟口味哉詩文亦然

聽松廬詩話

標題 題福建將軍平海圖

七古

十一月初一日

渡黃河

七古

建陽城外謝疊山賣卜處

七古

建溪二十四韻效昌黎體

五古

摘句 讀書如遊山觸目皆可悅

置身豈不高時有蹉跌慮

貴賤皆有營百歲誰得閒
但使妄念淨卽爲善閉關

昔未屬我前閱主已無數
過此落誰手麻亦聽所遇且隨現在緣
領此當前趣

當年爭洛蜀此外付金遼

白帶河

人懷見明月侍坐得春風

全收月窟歸封內原有星弧在掌中

西域人語

窮荒更遣蟠桃使降表連收貝葉文

宿衛舊開唐頡利衣冠今賜漢呼韓

由來六職分司馬況值諸戎貢旅獒

杜詩韓筆都堪愛王後盧前恐未安

壽如君頤祥符驗學比甘盤道脈尊

葛山

蜀道正需貔虎將此中可有郭汾陽

武會

古來名將惟郭汾陽以武舉出身

應知今日持衡手原是當年下第人

千度會

此日歐梅欣共事向來韓范本無爭

曲江春宴花無數遶海秋風淚幾行多少

遺珠收不盡中宵輾轉漏聲長

千古文章雖有價一時衡鑒豈無差

名士爲官原灑落詞人垂老半飢寒

車徒小駐三义路童稚爭看一品衣

時日暮微

寒余衣紅哆囉呢

王維早貴襄陽老俱是開元第一流

朱筠

字美叔號竹君順天大興人乾隆十九年進士官

侍講學士左遷編修有笥河文集

先生初爲諸城劉文正公所知及督安徽學政會
詔求遺書先生奏言翰林院貯有永樂大典內多有古書
世未見者請開局使尋閱且言樓輯之道甚備時

文正在軍機處顧不喜謂非政之要欲議寢之而
金壇于文襄公獨善先生奏與文正固爭執卒用
先生說上之

四庫全書館自是啟矣先生入京師居館中纂修日
下舊聞未幾文正卒文襄總裁館事先生顧不造
謁又時以持館中事與意迕文襄大憾一日見

上語及先生

上遽稱許朱筠學問文章殊過人文襄默不得發先生以
是獲安其督福建學政逾年

上使其弟珪代之歸數月遂卒先生爲人內友於兄弟而

外好交遊稱述人善惟恐不至後進之士多因以
得名尤喜小學勸人爲學先識字語意諄勤去而
人愛思之

惜抱軒文集

上命開四庫全書館凡十餘年而書成於是人文炳曜遠
邁唐宋而其始實自君發之

春融堂集

四庫全書得于永樂大典者凡五百餘部皆世所
不傳之本先生一言而此五百餘部之書其精神
心力得以復見於世嗚呼可謂盛業矣然非遭逢
聖主稽古右文儒臣亦曷由有此盛業哉

聽松廬文鈔

標題 平定準噶爾恭紀

四言百韻

摘句 帆如不動暮天沒听竟欲斜秋水流

王鳴盛

字鳳喈號禮堂江南嘉定人乾隆十九年

賜進士第二人官光祿寺卿有耕養齋集

乾隆十二年鄉試以五經中式時沈侍郎德潛門下吳泰來趙文哲張熙純錢大昕皆以博學工詩文稱而咸推鳴盛爲渠帥十九年以第二人及第二十一年大考翰林鳴盛名第一擢侍讀學士三十四年充福建正考官尋陞內閣學士兼禮部侍郎還京以濫用驛馬被吏議左遷光祿寺卿丁內

艱歸遂不復出鍵戶讀書垂三十年

春融堂集

所撰尚書後案以鄭馬爲主又撰十七史商權一百卷主於校勘本文補正譌脫最詳於輿地職官典章制度又撰蛾術編一百卷其目有十說錄說字說地說制說人說物說集說刻說通說系晚自號西泚卒年七十有八光祿嘗曰子門下士以金子璞園爲第一璞園名曰追嘉定諸生著有儀禮

正譌十七卷

國朝漢學師承記

詩綜三唐旣而旁涉宋人歸田後復守前說

湖海詩傳

標題

矯志篇

四

東崦西崦

五

雨泊江岬登

天門絕頂

古

摘句

時於白雲裏流水松花香

疎鐘烟外寺遠火渡頭船

曉漲雲浮岼春山翠壓城

殘歲辭家隨斷雁大江積雪上孤舟

三戶遺墟春草碧六朝舊事暮江平

醉裏人將春並去望中雲與水相齊

蘆中間渡真窮士漢上題襟少故人

長江九派東流去何事孤舟獨向西

錢大昕

字曉微號辛楣一號竹汀江南嘉定人乾隆十九年進士官少詹事有潛研堂集

君幼有神童之目乾隆十六年

高宗純皇帝南巡君獻賦

召試

賜舉人以內閣中書用入京與同年褚摺升吳荀叔講九章算術又以

御製數理精蘊兼綜中西法之妙悉心探賈由是用以觀史則自太初三統四分中至大衍下迄授時盡得其測算之法尤嗜金石文字最熟於歷代官制

益地里沿革所著經史荅問廿二史攷異通鑑注
辨正元詩紀事補元史氏族表補元史藝文志三
統術衍四史朔閏攷金石文跋尾養新錄諸書君
入中書後十九年成進士改庶吉士散館授編修
二十三年大考二等一名擢贊善尋遷侍讀二十
八年大考一等三名擢侍講學士三十七年擢少
詹事君以知足爲懷謂官至四品可休故奉諱歸
里不復出歷主鍾山婁東紫陽三書院而在紫陽
至十六年之久門下士積二千餘人嘉慶九年十
月二十日卒於書院年七十有七卒之日尙與諸

生口講指畫少疲倚枕而臥家人趨視則已與造

化者遊矣

春融堂集

戴編修震嘗謂人曰當代學者吾以曉徵爲第二人蓋東原毅然以第一人自居然東原之學以肆經爲宗不讀漢以後書若先生學究天人博綜羣

籍蔚然一代儒宗也

國朝漢學師承記

十駕齋養新錄爲嘉定錢氏晚年之書包羅廣大其義類似有可引伸者一條謂筮用錢始於齊隋唐初謹按朱子語類卜卦之錢始於京房又按胡一桂筮法變說引項平甫云以京房易考之世所

傳火珠林卽其遺法火珠林卽交單重拆也則錢
卜實自漢始矣一條謂魏孫叔然始爲翻語謹按
惠氏九經古義云不來爲狸并夾爲籥勃鞞爲披
後世反切之學本於此又按顧氏音學云爾雅禘
大祭也大祭正切禘字他如不律切筆鵲鵲切鳩
蔽膝切鞞則翻切由來久矣一條謂四聲始於齊
梁謹按三百篇涇以渭濁鐘鼓旣設充耳琇寶皆
具四聲又隋書經籍志晉有張諒撰四聲韻林則
四聲不自齊梁始矣一條論魁星謂奎非文章之
府謹按孝經援神契奎主文昌倉頡象宋均注

奎星屈曲相鉤似文字之畫然則日知錄謂奎文章之府未可議也至其論之創者謂鄭讀易簡之易與變易不易初無兩音又謂鄭注三禮並無麒麟皮冒鼓之說皆信而有徵豈獨可伸鄭耶錢氏以碩學雄視海內其書滿家竊意其博而能一通而近正則是書之可貴固不徒以典核也

修本堂稿

或問顧氏日知錄錢氏養新錄二書孰優余曰研究經史攷核典章博洽淹通誠難軒輊若汲汲焉以明體達用爲學勤勤焉以扶世翼教爲心有裨於治道有助於經世則日知錄一書未嘗非攷據

而不敢徒以攷據目之

松心
日錄

詠荆軻者多矣余最愛錢竹汀先生作詩云匕首

懷中出諸郎殿下看燕丹心未死趙政膽先寒成

敗論人易從容舍命難千秋猶灑淚易水共沈瀾

聽松廬

詩話

標題

田家雜詩五首

五古

中河

五古

石鼓

七古

琉璃廠窰戶掘土得古墓棺朽而骨殊異

其誌石題云大遼故銀青崇祿大夫上柱

國隴西李公督厥郎中改埋于故北東二

十步因撫誌文大略作詩遺攷古者

七古

讀漢書六首

五古

齋中無事與到輒書數

字八首

五古

生朝偶作

五古

禹廟二十四

韻

五言排律

平定準噶爾告捷禮成恭紀一

百韻

五言排律

回部蕩平大功告成恭紀一

百韻

七言排律

摘句

秋色江上來吳楚千里碧

雅頌風同源未可薄雕蟲

著錄晁公武評詩教器之

安心真是藥省事便成仙

江近山容潤冬來樹意寒

影形神互荅生老病相尋

四門唐博士萬戶漢通侯

門神

韓子文皆從道出淵公事可對人言

閫外建旌麾鐵騎軍門推轂賜黃封

金川平定

烏道千盤朝縹馬龍韜三略夜封章

分茅列爵周三等舞羽敷文舜兩階

却從鮮甲囊弓日爲念披堅執銳身感激

一時齊額手臨觴猶軫結纓人

凱宴諸將士

盡識軒轅通道遠方知光武開關非

浪傳阿母來青鳥却喜奇童對白鵲

茂陵

黃蓋竟因孤注勝青壇想見萬靈趨

詩中

直欲許身追稷契何曾譚藝薄盧王

杜文

百寶流蘇隨處挂不應全是爲令狐

李義

老子詎矜兵甲富秀才曾耐粥罄貧

范文

文章巨手唐燕許山水前盟漢向禽

歸愚

新詩想得江山助名士仍兼政事傳

明李

彈指淒涼成浩劫招魂慘澹隔重關空餘

老友懸河淚灑到天西木杲山

哭趙

兒女穿鍼翻舊樣詞人乞巧換新詩

間七

三楚颿檣風上下萬家煙火水東西

武昌

谿水一灣分向背山雲片刻改陰晴
曉山出霧皆成浪晚樹和煙半作雲
將相時來須重望功名論定要全終
美政久書江表傳詞人例作嶺南詩
文本性成兼有學句從苦得却能和
著書已勝金樓子汲古常攜玉帶生
歐陽集古一千卷洛社閒居二十年
偶借呼盧袁彥道居然完壁蘭相如
從古文章無定論由來場屋困名流
青紫那如名士貴漆膠獨與素心投

國朝詩人徵略卷三十五

國朝詩人徵略卷三十六

番禺張維屏子樹軒

王昶

字德甫號述庵江南嘉定人乾隆十九年進士官
刑部侍郎有春融堂集

公體貌修偉弱冠爲名諸生乾隆癸酉舉于鄉甲
戌成進士歸選班二十二年

高宗純皇帝南巡召試一等第一

賜內閣中書協辦侍讀直軍機房洊陞刑部主事員外郎
郎中三十三年以言兩淮鹽運提引事不密罷職

時緬甸未靖阿文成公以定邊右副將軍總督雲
貴請公佐軍事遂至騰越出銅壁關擊賊江中勝
之緬酋乞降阿公屬公草檄允其降班師旋永昌
緬甸貢表久未至復從阿公如騰越三十六年溫
公福代阿公移師四川辦金川事奉

旨授吏部主事從溫公西路軍進討溫公屬公作檄斥僧
克桑罪遂克斑斕山進攻日耳寨阿公奉

詔由北路進兵兼督南路公復從阿公軍攻克美美卡以
皮船渡水克小金川僧克桑遁澤旺降進討大金
川阿公奏公無兄弟母年七十餘明大義勗以殫

心軍事今從軍五年矣得

旨陞員外郎三十八年至當噶山山脊絕險官兵營壘與賊錯處且雨雪甚夏溫公兵潰木果木阿公亦退兵至翁古爾壟時警報絡繹

詔旨疊至公力疾叱馬懸厓日行數百里夜治章奏文書于礮火矢石之中無誤無畏冬大兵復進據美美卡攻大板昭小金川平補員外郎擢郎中復從討大金川克勒烏爾刳耳哇四十一年三路兵合攻益急索諾木等率衆投罪公草露布告捷于是兩金川悉平公在軍中前後九年每有所攻克輒議

敘凡加軍功十三級紀錄八次凱旋之日以戎服
行禮

賜宴奉

旨陞鴻臚寺卿賞戴花翎在軍機處行走四十二年擢大
理寺卿四十四年授都察院左副都御史四十五
年授江西按察使五十一年授雲南布政使五十
四年擢刑部右侍郎五十八年乞歸修墓冬還京
以病乞休

上鑒其老允之

諭以歲暮寒俟春融歸明年歸名其堂曰春融堂嘉慶四

年分賠滇銅鑾田宅以入官居于廟廡朋舊贈遺
盡以刻書五年重游泮宮十一年六月初七日卒
年八十有三順天鄉試會試公五爲同考官壬子
主順天鄉試士之出門下爲小門生及從游受業
者二千餘人公提倡風雅士藉品藻以成名致通
顯者甚衆生平重倫紀尙名節在軍營和平簡易
自科爾沁王以下皆親重之公所著春融堂詩文
集金石萃編湖海詩傳青浦詩傳琴畫樓詞續詞
綜等書皆刊成餘若天下書院志征緬紀聞屬車
雜誌朝聞錄等書四十餘種尙待次第校刊

望經室集

蘭泉先生有經術而通知時事爲儒臣而久歷戎
行博雅克擅夫詞章著述皆關於文獻而又愛才
若渴說士彌甘宜乎海內俊彥翕然稱之

聽松廬
文鈔

蘭泉先生論文云稍濃則近塗澤稍奧則近贗古

此道中甘苦之言學爲古文者宜知之

松軒
隨筆

述庵司寇北至興安南逾蠻幕句云昔依北斗今

南斗又從征金川句云我今更度大戕西已踰江

源一千里壯哉蓋古名將所歷罕及此者

聽松廬
詩話

虞夏時黃河循太行自北而東至涪水分九河以
殺其勢復爲逆河歸于海其餘衍沃皆資種食魏

晉六朝以至遼金皆精水利未有運南方粟米供給北方者自明開會通河運濟而北方水利久廢昔日九河今變爲三十六淀七十二沽千里內外沮洳淤澱海門又復狹隘不能迅速歸墟是以往昔膏腴悉歸蕪沒此述庵先生詩自註也論黃河今昔利病頗爲簡括

松心日錄

標題

古風贈沈學子

古五

觀伏波銅鼓聯句一

百二十韻

古五

詐馬

古七

榜什

古七

相撲

古七

教跳

古七

折卜尊丹巴瑚土克圖再

世來朝詩以紀之

古七

觀覺生寺大鐘聯

句一百八韻

古五

樂戶行

古七

雷回灘

古五

栗子冲曉行二首

古五

經高黎貢山

古七

皮船

古五

望日耳礪寨有作

古七

克僧

格宗

古七

美篤寺

古五

賜宴紫光閣紀

恩詩一百六十韻

古四

回部平定恭紀一

百韻

古五言
排律

副將軍振旅回永昌時屆歲

除追溯用兵顛末聯句八十韻

古五言
排律

摘句

小船如幽居夢醒聽柔艣湖天尙春陰層

雲被洲渚迴風掃垂楊殘滴下如雨溪橋

寂無人眷此孤禽語

一日過數灘灘獻奇警一灘亘數峰峰
峰露妍靚

野花歸子國新月楚人船

寒烟生竹屋殘雪滿漁舟

一德追伊呂三分限魏吳

諸葛忠武侯墓

鐘魚水寺傳山寺燈火吳船雜楚船

京口

古埭煙波思召伯空山草木走符堅

謝太傅祠

洵有才華開庾信誰知風義接靈均

宋玉宅

千古傷心朋黨論一時破膽敵人知

范文正祠

才子相門前代少詞臣躋迹異方多

楊升庵宅

光焰豈真同李杜風標端合繼歐蘇

王文簡公

別墅 二語論漁洋頗爲平允亦已推尊至矣

荷蓋忽傾知露重花牙微響識潮生

琅璫鳴場將刈麥桔槔戽水待栽秧

人從激箭流中坐船在崩崖罅裏行

絕塞定占擒頡利中朝已議靖烏桓

負嵎賊已同狼顧穴地人方等蝨行

呼鷹玉塞秋圍獵立馬金江曉勒兵

斫陣誰當楊大眼讀經偏愛賈長頭

簿書仍似東曹掾袴褶真同北府兵

令嚴誰敢爭先後路險安能卜死生
百年豈暇爲身後萬事難堪是眼前
文武勳名推吉甫中和樂職愧王褒
五色蟠龍紅袍日雙翎孔雀翠迎風
轉輸久已侔蕭相籌畫尤能贊晉公
四海人才歸月旦千秋詩派接風騷
漢唐寶刻掇殘本歐趙風流得替人
江關憔悴無人省只有傷心小庾知
遶牀竹馬年方少誰省微波足斷腸
寂寞金閨亭子畔綠陰門巷送殘春

范家相

字左南號蘅洲浙江會稽人乾隆十九年進士官
柳州知府有環渌軒詩草

三家詩拾遺范家相撰是編因王氏

應麟

之書重

加裒益而少變其體例近時惠棟九經古義余蕭
客古經解鉤沈於三家均有採掇論其賅備尙不
及是編也

提要四庫

詩瀋范家相撰是書大旨斟酌於小序朱傳之間
而斷以己意

同上

摘句 何事人間最惆悵月明風細聽吹簫

王又曾

字受銘號穀原浙江秀水人乾隆十九年進士官
刑部主事有丁辛老屋集

穀原極爲陳文勤公汪文端公稱許釋褐後皆以
爲當得上第旣入三甲人猶以秀水朱檢討爲比
性善飲談笑風生神情瀟灑作詩專仿宋人信手
拈來自多生趣

湖海詩傳

標題

迴谿草堂銷寒第六集

古五

林良九鷺圖

古七

摘句

折入最深處高挂五百丈近遠無定姿變

幻非一象

觀大龍湫

趁墟人裹飯畏虎客關門

秋生羣暑澹月出衆星低

畫橋脫板低新漲酒旆懸風澹舊題

橋外錫簫寒食路柳邊蠡殼酒船牕

翟灝

字晴江浙江仁和人乾隆十九年進士官教授有
無不宜齋集

先生博覽羣書精心考證著湖山便覽四書考異
爾雅補郭通俗編俱梓以行世

碧谿詩話

晴江居杭城東北臨江鄉村民咸以蠶桑爲生不知有習舉子業者自晴江讀書取科第于是其弟涵心淵瀚元洲樹傳霖皆以能詩稱

湖海詩傳

標題

湯婆子聯句

五古

咏煙草三十六韻

五言排律

摘句

桑畦遠隔人家小菜甲平連雉堞遙

峴口人家皆種柳船中客饌每供魚

沈業富

字方穀號旣堂江南高郵人乾隆十九年進士官

河東鹽運使

君性情醇厚篤於友朋武進黃仲則過河東畱之

賓館病中裒其諸作抄錄成編俾無遺佚竹西自
午橋太史沒詩壇寥落君以詞林耆宿家居望重

香山洛社之風賴以不墜

湖海詩傳

都轉守太平最久收荒恤災至今民思之

種竹軒餘話

摘句

過客情懷逢竹院閒農風味是柴門

牛背遠浮新漲滿馬蹄平踏亂雲低

葉佩蓀

字丹穎浙江歸安人乾隆十九年進士官湖北布

政使有傳經堂集

丹穎覃心易理獨契微言著易守四十卷勃窣理

廣多前人所未逮

湖海詩傳

摘句 行路此身賤謀生吾道艱

真從田父語莫作使君看

一線波盤江北去百重山壓漢東來

曹學閔

字孝如號慕堂山西汾陽人乾隆十九年進士官
宗人府府丞有紫雲山房詩鈔

公在臺垣八年所陳奏於民生吏治皆有裨益性
耽山水暇輒與三四知己出國門游賞如潭柘戒
壇祕魔厓香界寺往往流連信宿生平不臧否人

物而胸中界限分明嘗曰人各有所偏但當棄短

取長否則無一人可交矣

潛研堂集

摘句 致身有具從行伍黥面無妨出將材

狄武襄祠

何在田

字鶴年江西廣昌人乾隆二十一年舉人有玉耕

堂詩集

在田高簡厭馳驚寄南昌僧舍鉛山蔣士銓見其

詩壁間與訂交始知名

江西詩徵

袁子才過南昌時蔣心餘病風口不能言以左手

書何鶴年詩數聯老輩之愛才如此

聽松廬詩話

賤骨草葉如薊麥中有赤心人截取之得土卽活
能治重傷凡跌損者以根漬酒服之立效攷古方
書皆未載惟見於何鶴年詩集中憶余兩年血痢
百藥不效服鴉膽子四十九粒一服而愈鴉膽子
本草未載因思有一病卽有一藥天生百穀以養
人又生百草以救人天心仁愛於此可見
松軒
隨筆
標題 子陵先生釣臺古 南昌閔節婦五
摘句 早歲貧著書動欲成簡冊消磨客氣盡積
寸未得尺

飽帆遇颶風收發豈由我

前賢失足處未敢輕唾罵

野徑無人問隨牛自得村

早霞隨日上敗葉擁潮行

荒程難計里野飯不成餐

樵室薪爲榻漁舟網作帆

移牀蟲見蛻徹饌蟻微糧

藉懶成高志因貧得儉名

有客嫌庭窄無書覺晝長

枕酣新夢美酒罷故愁生

月借日光成半面雨收雲氣泛餘絲

豈有奇才堪許國無端隨衆強離家
容悴多因爲客早心閒還幸受恩稀
客少常畱不鳴雁睡酣翻喜失晨雞
寒星欲失見漁父小雨無聲添落花

國朝詩人徵略卷三十六